

## Däe Frisöer

Monika Schmitter

Moste en Viersche no däe Frisöer, brugste net wiit te loope. Neet wiir as 50Meter – doe ös der nägste Laade.

Wat solle se möt disch make? Maar schniie? Drüsch af möt jewäsche Hoere? En neue Klüür! Dat jriise soll niemes mir siien. Blonde Schtriipe – af ruue Hoere. Aafschniie af waase loete? En Dauerwel wüer och ens schuen! Dat mödde op vandaach de Mannslüü wii de Vraues anjeäve,

Et ös bald 40 Joar her, doe leet isch misch ens Dauerwele make. Ich woer dii jraade Hoere saat. Lockenkopf woer der letsde Schreii. Dat mot isch hadde. En Protseduer möt vüel Papirkes, kleene Röllkes, Schtänskes, dii de Röllkes vooshoone on en dor Kopp pekke, jät Schemii on jet wärme Loft uut dii Haube. Twiie Schtont on isch haat Nejerkrause.

Minne Mann on min kleeneDauter woore scthiief vor Schreck, als se misch soere. Isch mot verschpräeke,,: keen Dauerwele mir. So ös et jeblieve bös op vandaach.

Vöerije Wäek hadde sisch min Dauter on min Schwäjersche be der Frisöer jetroffe. Se soete näveneen, vör de Hoere to wäsche. Et joav maar kalt Water, dor Beuler woer kapott. Dii Mäedsches woose sisch te helpe: se koeme möt Jiiskane on Emerkes voll möt wärm Water, töschendur och ens jett äersch heet. Dii twiie hadde et överschtange.

So jants neevebe erväeste be der Frisöer och alerhand! Uut de Tsaitung uever Schtars on Schternschen, de Könijshüüser on os Politiker. Äver et wöerd och vüel jeschwatt, männisch kiir jet dekk opjedraare on jeloere on dan vrochste disch: wii woer dat no, wat heer sät, dar söe sät, dat heer dat so jesaid hadde sol.

